

MUKANDA A HENDI WAKAFUNDELA PAULU ASI

KORETO

Ambâatumela Moyo

1 Paulu, utumami a Kristu Jesu uma lu lulangu la Unyashungu, la unyasu Timote.

Le Ekelezia ka Unyashungu keli la Koreto, ndu le ekilami tshe weli l'Akaya tshe:

2 Ngandji ka mamba kayali la nyu, ndu ki k'uma le Unyashungu Shesu, la uma le Khumadiondjo Jesu Kristu!

"Unyashungu w'Ekikitshelu Tshe"

3 Lutumbu layali le Unyashungu Shi Khumesu Jesu Kristu, Shesu ka ketshi, Unyashungu w'ekikitshelu tshe; 4 latutukikithasaka lu asui tshe, dia shu mbeya nkikitsa akina lu asui awo l'ekikitshelu kakatukikitsa Unyashungu. 5 Ne dia uku atutuyalaka la asui efula le Kristu, mbatutuyalaka la ekikitshelu efula uma le Kristu. 6 Naka shu tambusuyama, oso eli ne dia ekikitshelu kanyu la panda kanyu. Naka shu tambukikitshama, oso eli ne dia ekikitshelu, kanyu, katutungaka eshikikelu ka eteti l'asui watusuyawo. 7 Elungamelu kasu le nyu kambushikikala, ne dia shu mbeyaka shati: Uku ambunyusuyama la su, okone nyambukikitshama la su.

8 Anyasu, shu nangaka nyu mbeya dikambu di'asui wakatundi l'Asiya, la wutshu wutamanya, wuleki wulu asu, wakatukutute; ku takakan shati: Tayubo. 9 Keli shu taki la manyema ka nyoi l'atei asu, diaha shu ndjalangamelu, keli dia shu nungamela Unyashungu, latululaka wakavu. 10 Ndi lakatutshungula uma lu nyoi keku ka wuki, ayututshungulaka. Shu tambulungamela shati: Ndi ayututshungula ndu kakiante. 11 Ndu nyu nyambutukimanyia la dombelo dianyu, ne dia antu efula watukeli Unyashungu lusaka, ne dia ushasha wakatusha antu efula.

Paulu Akakendakenda l'Atei Awo lu Akambu wa Mete Atu

12 Shu tambuyatumbula lu dikambu ne; ndu khum'utema keli omenyi asu ati:

Shu takakendakenda l'atei a wa la kete, djekaleka l'atei anyu, lu ekila la mete ka Unyashungu; aha lu yimba y'antu, keli lu ngandji ka mamba ka Unyashungu.. 13 Shu hatunyufundela akambu akina, paka akambu walanyu la weyanyu. Dimi lambulungamela nti: Nyu nyayuwaeya edja ndu l'ekumelu, 14 uku akanyateyi etenyi nyati: Shu telu lutumbu lanyu, la nyu nyeko lutumbu lasu, lu lushi la Khumesu Jesu.

Paulu Kundjala la Uhakuhaku

Lam'akandasanguya Nkalula la Ntuwaenda

15 Ne dia elungamelu kene, mbakamasanguya ndja le nyu la ntundu, ne dia nyu ndjala la ongenongeno ukina. 16 Dimi lakalangi mbetta le nyu utsha la Makedoniya, la uma la Makedoniya ku nkälula le nyu ntu, ku nyu ndekiyami lu lokendo lami utsha la Judiya. 17 Lam'akamasanguya osoku, dimi laki la uhakuhaku uka? Akambu wakamasanguya ntsha, lakasanguya uku lu akambu wa dimba, dia dimi mvuta nti: Elu, la Kema, lu etena otoi? 18 Keli uku eli Unyashungu la kolamelu, diui diasu le nyu kundjala Elu la Kema. 19 Ne dia Jesu Kristu, On'a Unyashungu, lakatanyusambisha, ndu dimi ndu Silivano ndu Timote, ndi taki Elu la Kema; le ndi ndjalaka Elu nshi tshe. 20 Ne dia alaka tshe wa Unyashungu watutanaka Elu kawo le ndi. Okone ndu Ayali Osoku ndjalaka le ndi, dia Unyashungu ntumbwama. 21 Unyashungu ambutushikike kame la nyu le Kristu, ambutukita iso. 22 Ndi ambutudja djimbitelu, ambutusha Nyuma okole l'etema asu.

Paulu Kuntsho le Wo Esadi ne Dia Ololo Awo

23 Keli dimi lambeta Unyashungu uku omenyi lu lumu lami nti: Dimi lakaseke ndja la Koreto, ne dia latukuyunyuha ngwela. 24 Shu hatahamela mbetawo kanyu, keli teko ekimanyidi w'ongenongeno anyu, ne dia nyu nyambushikikala lu mbetawo kanyu.

2 KORETO

2 Dimi lakasanguya dikambu ne nti: Handjuya le nyu ntu la lunyangu. 2 Naka dimi lambunyunyangia, untu akona ayongenyanganya, naka aha one lakamanyangisha? 3 Dimi lakafundi dikambu so, ne dia dimi hayala la lunyangu, uma le wane weli la dikambu dia ngenyangenyami lam'ayumuya. Dimi lakanyulungamela, nyu tshe, nti: Ongengeneno ami eko ongenengeno anyu, nyu tshe. 4 Ne dia uma l'okei efula la ulingulingu l'utema, mbakamanyufundela mukanda la asoi efula lu ashu. Aha ne dia nyunyangia, keli dia nyu mbeya ngandji kami k'utamanya le nyu.

Dia Nyimanya Utshi a Kolo Kolo Yandi

5 Keli naka untu ambutunga lunyangu, ndi hanyangia dim'utu, keli, lu wuhu omotshi — aha dia ntekoya nyunyangia — ndu le nyu tshe. 6 Asui andi ane wakanyusuya nyu wane wakaleki efula, wakaku. 7 Okone oolo nyu mbudimanyia kolo yandi la mbukikitsa, ndi atukolembiamba la lunyangu landi utamanya. 8 Okone dimi lambunyosengasenga nti: Nyushikike ngandji kanyu le ndi. 9 Ndu dia dikambu ne mbafundami dia dimi nyuhimba, kana nyu nyeko la ukitanya lu akambu tshe. 10 Keli lam'ayunyudimanyia untu kolo yandi, ndu dimi layudimanyia akambu wakamudimanyia. Dimi lakudimanyia lu ashu a Kristu dikambu dianyu, 11 ne dia Satana atukutuleka wulu: shu mbeayaka ditshelu diandi.

12 Lam'akamakumi la Toroa dia lukumu l'ololo la Kristu, lam'akawandjhewla lukuki le Khumadiondjo, 13 utema ami kundjala la ki, ne dia dimi kuntana Tito onalingu. Okone lakawasha moyo, ku lakatshu la Makedoniya.

14 Keli Unyashungu, latutolombolaka nshi tshe l'elekelu k'akambu le Kristu, ndu latudianganya upumu w'ololo andi lu ahuli tshe uma le su, atumbwami! 15 Ne dia shu teko upumu w'ololo wa Kristu le Unyashungu, le waku wambushimbamela, ndu le waku wambushisho. 16 Le omotshi teli upumu w'uma lu nyoi utsha lu nyoi; le akina teko upumu w'uma lu lumu utsha lu lumu. Akona ambukuka lu akambu ane? 17 Ne dia shu kema uku antu efula, wane watulanya diui dia Unyashungu, keli shu teko uku antu wa mete, uku wane wakatumama uma le Unyashungu, la lu ashu a Unyashungu, mbatutoteketaka le Kristu.

"Ny Nyeli Mukanda wa Kristu"

3 Shu tambutatela ndjeyanya ntu uka? Kana shu la uhumba wa mukanda wa ndjenyanya le nyu, kana uma le nyu, uku atutshaka antu amotshi? 2 Nyu nyame nyeko mukanda asu wa ndjenyanya, wambufundama l'etema anyu, dia imbezaya la mbalema le antu tshe. 3 Nyu nyambenama nyati: Nyu nyeli mukanda wa Kristu wakatatumi, wahafundama l'ashi a mukanda, keli la Nyuma ka Unyashungu a lumu. Aha lu tuhasi t'ave, keli lu tahasi t'etema w'antu.

Ekambi wa Sheki y'Uyuyu

4 Elungamelu keso keli la su le Unyashungu uma le Kristu. 5 Shu shame hatukuki, dia shu nkana shati: Engo kambuya una le su shame, keli ekukelu kasu keko uma le Unyashungu. 6 Ndi akatuhilula dia shu nkuka uku ekambi wa sheki y'uyuyu, aha ekambi wa diui diufundami tu, keli ekambi wa Nyuma; ne dia diui tu diatutudiaka, keli Nyuma atutushaka lumu.

7 Keli naka ekambelu ka nyoi kakafundama l'aleta lu ave, kakayi kame la lutumbu, wuhu waki asi Isariyele kumbeya menda elundji ka Mose tee, ne dia lutumbu laki l'elundji kandi, lutumbu lako lakatakitakita. 8 Okone ekambelu ka Nyuma haleki ndjala la lutumbu lutamanya uka? 9 Ne dia naka ekambelu ka dianyelu keko la lutumbu, ku lutumbu l'akambu w'ololo layuleka lutumbu loso. 10 Mete, akambu wakayala la lutumbu ntundu, kema la lutumbu kakiane, ne dia lutumbu lone lambuleka lutumbu loso. 11 Ne dia naka akambu wakakitakita waki la lutumbu, ku akambu wtshikadi wayuleka lutumbu efula.

"Lam'eli Nyuma ka Khumadiondjo, Ndjadjasela Keko Laawo"

12 Ne dia elungamelu keku, mbesu la dihungaefula lam'atelasu antu diui, 13 aha uku Mose, lakakumbi dihondo di'ekumbamelu l'elundji kandi, dia asi Isariyele watukenda ekumelu k'akambu wakakitakita. 14 Keli tukanyi tawo takakikitala, ne dia edja ndu elo, lam'alawo lu sheki y'edjedja, dihondo diako di'ekumbamelu ntshikalaka diukumbami le wo edja ndu elo, ne dia dio diambunyema paka le Kristu. 15 Keli edja ndu elo, tena tshe lam'alawo mukanda a Mose, dihondo di'ekumbamelu ndjalaka lu tukanyi tawo. 16 Keli lam'ambukadimo untu le Khumadiondjo, dihondo diako diatunyemaka. 17 Khumadiondjo eli

Nyuma. Lam'eli Nyuma ka Khumadiondjo, ndjadjasela keko laawo. 18 Keli shu tshe, lam'endasu lutumbu la Khumadiondjo la dundji diahakumbami, uku lu lulindu, shu tambuhilwama lu efanelu kandi, uma lu edelu kemotsshi utsha lu edelu kekina ka lu lutumbu, uma le Khumadiondjo leli Nyuma.

***"Ne dia Shu Teko la Ulimu One,
Shu Hatuheko"***

4 Okone, dia shu ndjala la ulimu one w'uma lu ketshi ka Unyashungu, shu hatuheko. 2 Keli shu tambutuna akambu wushami wa sonyi, shu hatutshi lu akambu wa doho, kana hatukesi antu la diui dia Unyashungu, keli tambushula akambu wa mete. Okone tambuyaenya le khum'utema k'untu l'untu lu ashu a Unyashungu. 3 Naka lukumu l'ololo lasu leli la dihondo di'ekumbamelu, lo lambukumbamba paka le wane washisho. 4 Etemolatemola ka la kete nye ambete waku wahetawo uku tutshungu lu tukanyi tawo, ne dia usasi a lukumu l'ololo la lutumbu la Kristu, leli efanelu ka Unyashungu tawahetelaki. 5 Ne dia shu hatuyasambisha, keli shu tambusambisha Kristu Jesu uku Khumadiondjo, la shu shame uku ekambi anyu lu dikambu dia Jesu. 6 Ne dia Unyashungu akati ati: Usasi wayoheta uma lu udjima, vo wamboheta l'etema asu, ne dia ntusha usasi wa mbeaya lutumbu la Unyashungu l'elundji ka Jesu.

7 Keli shu teko la diango ne dia mumba lu dikitshelu dia kete, ne dia wuki a wulu utamanya ayali uma le Unyashungu, aha uma le su shame. 8 Shu tambusuyama lu beke tshe, keli tatahinama; tambukanana, keli tataheko; 9 tambusuyama, keli tatasekama; tambumbamba la kete, keli tatadiakema. 10 Nshi tshe, shu temembaka djimbitelu ya nyoi ka Jesu lu dimba, ne dia lumu la Jesu lenami lu alimba asu. 11 Ne dia shu wane weli la lumu, tatukimomaka dia mvo lu dikambu dia Jesu, ne dia lumu la Jesu lenami l'alimba asu wa nyoi. 12 Okone nyoi ambukamba ulimu l'atei asu, keli lumu l'atei anyu.

13 Keli shu teko la utema a mbetawo kame, uku diui diakafundama ati: Dimi laketa, okone mbakamateketa, ndu shu tambetawo, okone ndu shu tamboteketa; 14 ne dia shu mbeyaka shati: One lakulula Khumadiondjo Jesu ayutulula ndu shu kame la Jesu, ayutemadia kame la nyu la ntundu kandi. 15 Ne dia akambu tshe weko dikambu dianyu, ne dia ngandji ka mamba kafuli le

antu wuleki efula, la eukelu ka lusaka afuli utsha lu lutumbu la Unyashungu.

16 Okone shu hatuheko. Keli kuyanga dimba diasu diatuvokaka, utema asu atuyalaka uuyu la lushi la lushi. 17 Ne dia asui asu wa tshitshe wa kakiane wambutamanya ntutungela lutumbu la wuki pundju. 18 Ne dia shu hatendi diango dienama, tatendaka diango diahenama, ne dia diango dienama dieko dia kakiane, keli diango diahenama dieli pundju.

***"Tambuleka Nanga Mumo Uma lu
Dimba Dia Ndjala Laka Khumadiondjo"***

5 Shu mbeyaka shati: Lam'ayuhandjo luudu la dimba diasu dia la kete, shu teko la luudu l'uma le Unyashungu, luudu laki kumpikama l'anya, lo leko pundju l'ulungu. 2 Mete, lam'ekisu lu luudu lone, shu tatukhumaka akhumu, tambukumbula dia shu nkumbamba la edjaselu kasu k'uma l'ulungu. 3 Lam'ayutolota osoku, shu hatutanema etakataka. 4 Ne dia mete, shu ane weli lu luudu lone tatukhumaka akhumu ne dia wetshu, aha dia shu ndjala etakataka, keli dia shu ndotshama dia kene keli nyoi menama le kene keli lumu. 5 One lakatolongsola dia dikambu ne eli Unyashungu, lakatusha okole na Nyuma.

6 Okone shu tatuyalaka la dihunga nshi tshe. Shu tambeya shati: Lam'ekisu shu kema laka Khumadiondjo, 7 ne dia shu tatokendakenda la mbetawo, aha la loseno. 8 Okone shu teko la dihunga, tambuleka nanga mumo uma lu dimba, dia shu ndjala laka Khumadiondjo. 9 Uma lu dikambu so, shu tatulangaka mbongenyangnya, kana shu teko la dimba, kana taha la dimba. 10 Ne dia dieli la su, shu tshe, dia menama la ntundu k'elumbwelu ka Kristu, dia untu l'untu nungula akambu uku akandatshi lam'akindi lu dimba, kana ololo kana kolo.

"Ngandji ka Kristu Atutosedingaka"

11 Ne dia shu mbeyaka woma wa Khumadiondjo, shu tambetawuya antu, keli shu tambeyama le Unyashungu. Dimi lambulungamela nti: Tambeyama ndu le khum'etema yanyu. 12 Shu hatuyaeyanya le nyu ntu, keli shu tambunyutshikela dihuli dia nyu ndjatumbula lu dikambu diasu, ne dia nyu ndjala la wulu wa nkaluya diui le waku watuyatumbulaka lu ashu w'antu, aha uma l'etema. 13 Naka shu tambudjo la yimba, dikambu so dieko dia Unyashungu. Naka shu la yimba y'ololo, dikambu so dieko dianyu.

2 KORETO

14 Ne dia ngandji ka Kristu atutosedingaka, ne dia shu mbetawoka shati: Otoi kakavwela tshe, okone tshe wakavu. 15 Ndi akavwela tshe, ne dia waku weli la lumu, tawuyalaki la lumu dia dikambu diawo vame, keli dia one lakävwela, lakulwama dikambu diawo.

Ekesanelu Kasu la Unyashungu Keko Uma le Kristu

16 Okone umaka kaktiane, shu hateyi untu lu wuhu wa dimba, uku akateyi Kristu lu wuhu wa dimba, shu hatuweyi osoku ntu. 17 Okone naka untu eko le Kristu, ndi ambuyala etungamelu k'uyuyu. Akambu w'edjedja wambetaka, enda, akambu tshe wambuyala eyuyu. 18 Keli akambu tshe weli uma le Unyashungu, lakayaekesanya la su ndame uma le Kristu, ndu lakatusha ekambelu k'ekesanelu; 19 ati: Unyashungu aki le Kristu dia mbakesanya wa la kete la ndi, aha mbâlela ediakelu kawo k'elembe, keli akatukitshiya diui di'ekesanelu. 20 Okone shu teko akendji wa Kristu, uku akanyosengasenga Unyashungu l'enyo asu. Shu tambunyosengasenga dia dikambu dia Kristu shati: Nyekesaneli la Unyashungu. 21 One laki kumbuya akambu wa kolo, Unyashungu akawete uku ulambu w'akambu wa kolo dia dikambu diasu; ne dia shu ndjala uku ololo a Unyashungu l'utema andi.

Lu Akambu Tshe Dieli la Su Dia Ndjaenya Uku Ekambi wa Unyashungu

6 Shu tatukambaka kame la Unyashungu, tambunyosengasenga shati: Tanyulungulaki ngandji ka mamba ka Unyashungu anyanya; 2 ne dia ndi akati ati: L'etenka k'ololo, dimi lakakuhukama; Lu lushi la panda, dimi lakakukimanya.

Ulungi, kakiane eko etena k'ololo; enda, kakiane eko lushi la panda. 3 Tukitshiyaki untu utamba a ntakanya nduku yema, ne dia ekambelu kasu katukonywama. 4 Keli lu akambu tshe, shu tatuyaenya uku ekambi wa Unyashungu: lu ekikelu ka mamba, lu asui, lu ehumba, lu akambu wa penyo, 5 lu dikomoki, lu mvudu ya kanu, lu mindju, lu pa, lu senelo, lu dikilelu dia mbu ya nde; 6 lu pudipudi, lu ewu, lu ndjakimela k'edja, lu ketshi, lu Nyuma k'Ekila, lu ngandji kaha la lukesu; 7 lu diui dia mete, lu wulu a Unyashungu, lu eloto wa ta w'akambu w'ololo, lu lunya la pami ndu lu lunya la lomoso; 8 la lutumbu ndu la dionyo, la lukumu la kolo ndu la lukumu l'ololo; uku

akanga wa kashi, keli teko la aui wa mete; 9 uku wane waheyama, ku tambeyama ololo; uku wane wayangga mvo, ku teko la lumu; uku wane wasuyama, keli tatadiakema; 10 uku akanga wa lunyangu, keli shu tatongenangenaka nshi tshe; uku akanga a weula, keli shu tatongonyaka antu efula; uku wane waha la engo, keli shu teko akanga wa diango tshe.

11 Asi Koreto li! enyo asu wambudiho uya le nyu, etema asu wambuyala hwe. 12 Nyu kema pika lu etem'asu, keli nyu nyame mbeli pika lu ngandji kanyu. 13 Ne dia nemanya la nyu — lambunyutela uku an'ami — nyudihuli ndu nyu etema anyu hwe.

Embetawudi Tawosohanaki la Wane Wahetawo

14 Tanyosohanaki kame la wane wahetawo. Ne dia ololo la kolo weko la esohanelu kakona? Yani la udjima ukundi ewo pupu? 15 Kristu eko la Belyala ekesanelu kakona? Umabetawudi la untu lahetawo weko la etenyi kakona kame? 16 Etemwelo ka Unyashungu la ka dikishi weko la esohanelu kakona? ne dia shu teko etemwelo ka Unyashungu a lumu; uku akati Unyashungu ati: Dimi layuyala lu etema awo, Layokendakenda lu etema awo. Dimi layuyala Unyashungu awo, Ndu vo wayuyala antu ami. 17 Okone nyumo uma l'atei awo, Nyuyatuli uma le wo, mbata Khumadiondjo, Tanyunandaki engo ka kolo; Ku dimi layunyulungula, 18 Layuyala uku Shenyu, Nyu nyayuyala an'ami w'apami la an'ami w'amantu, Mbata Khumadiondjo Kanga-Wulu-Tshe.

7 Okone, anyasu wa ngandji, ne dia shu teko la alaka ane, tuyalongosole uma lu mindu tshe ya dimba ndu y'etema, tuluwanya w'ekila la woma a Unyashungu.

Eyelu ka Tito Akayala Ekikitshelu la Ongenongeno le Su

2 Nyutudihweli etema anyu. Shu kuntshela nduku untu kolo, shu kunanya nduku untu, shu kunkesa nduku untu. 3 Dimi halati osoku dia nyamia, ne dia dimi lakati ntundu nti: Nyu nyeko lu etema asu, dia mvo kame ndu ndjala la lumu kame. 4 Dimi leko la elungamelu ka wulu le nyu! Dimi leko la ufumu a wulu lu dikambu dianyu! Dimi lambuludiamma l'ekikitshelu; lambulula l'ongenongeno otekoya lu asui asu tshe.

5 Ndu lam'akatakumi la Makedoniya, alimba asu tawaki la mumuya, keli takasuyama lu beke tshe — ata waki l'andja, weoma waki lu etema. 6 Keli Unyashungu latukikitshaka akanga a ndjakitshakitsha, ndi akatukikitsha lam'akyai Tito. 7 Aha ne dia eyelu kandi ketu, keli takakikitshama ndu uma l'ekikitshelu kakanyükitsita lam'akandatutela ekumbwelu kanyu, la delu dianyu, la saki kanyu dia dikambu diam. Osoku dimi lakaleki ngenangena. 8 Kuyanga mukanda ami akanyunyangia, dimi hayatshumuya dikambu diku: lakayatshumuya ntundu (ne dia lakenyi nti: Mukanda uku akanyunyangia nshi motshi tshu), 9 ku kakiane dimi lambonganangena, aha ne dia dimi lakanyunyangia, keli ne dia nyu nyakanyangi, edja ndu ekadimwelu k'etema; ne dia nyu nyakayangiam uku lulangu la Unyashungu, diaha nyu nshisha engo dia dikambu diasu. 10 Ne dia lunyangu uku lulangu la Unyashungu atutungaka ekadimwelu k'utema utsha lu panda. Untu hayatshumuya ne dia ekadimwelu keku, keli lunyangu la wa la kete atutungaka nyoi. 11 Nyendi, ne dia nyu nyakanyangiam uku lulangu la Unyashungu, dikambu diako mbambutunga elamelu ka wulu l'etema anyu, ndu nyindjama, ndu kele, ndu woma, ndu ekumbwelu, ndu saki, ndu esombweyo! Nyu nyakayayindja lu akambu ane tshe. 12 Osoku mbakamanyufundela mukanda, aha ne dia one lakatshi dikambu dia kolo, aha ne dia one lakandatshela kolo, keli ne dia elamelu kanyu le su kenami lu ashu a Unyashungu. 13 Okone shu takakikitshama.

Lu ekikitshelu kasu, mbakatamatanya ngenangena ne dia ongenongeno a Tito, ne dia nyu tshe mbakasalanganya utema andi. 14 Ne dia dimi kumbutshama sonyi lam'akamanyutumba le ndi. Keli uku akatanyutela akambu tshe mete, okone ndu aui ami wa nyutumbula wakamat la ntundu ka Tito, wakenama ati: Mete. 15 Ngandji kandi kambuleka efula le nyu lam'uhondi ukitanyia anyu tshe, okone akanyülungula la woma la lukumba. 16 Dimi lambonganangena ne dia elungamelu keli la mi dia dikambu dianyu.

Nyukuya Lukahu l'Asi Makedoniya le Ekilami

8 Dikambu dikina, anyasu, shu nangaka nyu mbeya dia ngandji ka mamba ka Unyashungu, kakandasha Ekelezia wa la Makedoniya. 2 Okone lu ehimbela k'asui,

ongenongeno awo efula la wula awo wakamatanya mbudia lukahu lawo. 3 Dimi lambunyutela uku omenyi nti: Uku wulu awo, ndu ndeka wulu awo, vame wakakimo diango; 4 wakatosengasenga otokye dia ngandji ka mamba kene la dia eksanelu kasu, dia nkambela ekilami — 5 Vo wakaleki elungamelu kasu; ntundu wakayakimo le Khumadiiondjo, ndu le su, uma lu lulanglu la Unyashungu. 6 Dia dikambu ne, mbakatakomiyia Tito, uku akandatatale ulimu one ntundu, dia ndi nyanga nkukia ngandji ka mamba kene ndu le nyu. 7 Uku akanyakuki lu akambu tshe lu mabetawo, ndu lu wutelu, ndu l'ewu, ndu l'ukalanganu tshe, ndu lu ngandji kanyu le su, okone nyuyangi nkukanya ndu ngandji ka mamba kene.

8 Dimi hanyutela diui ne uku olembe, keli dia mbyea mete ka ngandji kanyu la ukalanganu w'akina. 9 Ne dia nyu mbeyaka ngandji ka mamba ka Khumesu Jesu Kristu, nyati: Kuyanga ndi aki ongonyi, ndi akayala la wula dia dikambu dianyu, dia nyu ndjala engonyi uma lu wula andi. 10 Dimi lambunyutela tukanyi tamu lu dikambu ne nti: Ndeka ololo, nyu wane wakatatela dikambu ne eleku ka okongo, dia nyu dishidiya kakiane, aha dia ntsha tshu, keli ndu dia nanga ntsha. 11 Keli kakiane nyumani ntsha, uku akanyalangi ntsha, okone nyuyali la wulu wa dishidiya. 12 Naka lulangu leko, layetawoma uku yediko le untu, aha yediko yaha la ndi. 13 Dimi halati diui ne dia akina nsalangana, la nyu ndjala la lunyangu. 14 Keli ne dia mbedimia yediko pupu, diango dianyu efula l'etena kene, diambukuka dia ehumba awo, ne dia diango diawo efula ntu diakuki l'ehumba anyu. Okone nyayedima pupu. 15 Uku akafundama ati: One lakasanganya efula, taki la engo kakatshikala; lakasanganya tshitshe, kumpumba.

Tito la Asikandi Wayali Elomboki lu Dikambu Ne

16 Keli tambuka Unyashungu lusaka, ne dia ndi ambudja tukanyi ta nyulama ololo l'utema a Tito. 17 Aha paka ne dia ndi aketawo daku diasu, keli ndu ndame aki la ukalanganu efula, akatshu le nyu dia lulangu landi. 18 Ku shu takatumi unyasu kame la ndi, leli la diandu lu lukumu l'ololo l'Ekelezia tshe. 19 Aha dikambu so tu, keli ndi akasonama ndu uma le Ekelezia, dia nkindula la su la ngandji ka mamba kene, kakambelasu lu lutumbu la Khumadiiondjo, dia dia menya antu ukalanganu asu. 20 Shu tambetawo dikambu

2 KORETO

ne, dia untu atukutosongwela ne dia ushasha one wakambelasu. 21 Ne dia shu tatukanaka yimba y'akambu wa kenemo, aha lu ashu wa Khumadiiondo utu, keli ndu lu ashu w'antu. 22 Shu takatumi unyasu kame la wo, takedika ukalanganu andi tena kambi lu akambu efula, keli ukalanganu ako ambutamanya kakiane, ne dia elungamelu ka wuki keli la ndi le nyu. 23 Naka untu ambunyumbula dikambu dia Tito: ndi eko umbekesanedi ami la unyami ukambi lu dikambu dianyu; ndu dia anyasu, vo weko akendji wa Ekelezia, vo weli lutumbu la Kristu. 24 Okone nyuwaenya djimbitelu ya ngandji kanyu la ntundu ka Ekelezia, ndu ndjatumbula kasu lu dikambu dianyu.

Unyashungu Nangaka One Lakimo l'Ongeononganeno

9 Dimi kema la dikambu dia nyufundela dia nkambela ekilami. 2 Ne dia dimi mbeyaka ukalanganu anyu, wakamanyutumbula le asi Makedoniya nti: Asi Akaya wambuyalongosolaka eleku k'utundu. Ukalanganu anyu ambosemanela la amotshi efula. 3 Keli dimi lambutuma anyasu, dia ndjatumbula kasu lu dikambu dianyu tayalaki uyalayala. Uku akamatii, dimi nangaka nyu nongoswama. 4 Naka antu amotshi wayuya kame la mi uma la Makedoniya, wayunyutana nyatayalongosola, ku shu —hatulangi mvuta shati: Nyu — tayutshama sonyi lu elungamelu kene. 5 Okone dimi lakakanii nti: Ololo nsengasenga anyasu, vo watateli la ntundu utsha le nyu. Vo watasanganyisha eshasha wakanyalaki ntundu, ne dia diango diku diayali uku ushasha, aha la khudu.

6 Dimi lambunyutela dikambu ne nti: Untu lune diango tshitshie, ayuna diango tshitshie; untu lune diango efula, ayuna diango efula. 7 Untu l'untu akimo uku akandati l'utema andi, aha la lunyangu, aha la khudu, ne dia Unyashungu nangaka untu latukimoka l'ongenonganeno. 8 Unyashungu mbeyaka nyufudiya ngandji ka mamba tshe, ne dia nyu nyatayalaka la diango kambi nshi tshe, ku nyufudia lu elimu w'ololo tshe. 9 Uku akafundama ati: One lakadianganyaka diango, Ndi akashaka akanga a weula eshasha; Ololo andi atutshikalaka pundju. 10 One latushaka umbuki wuhu la ma dia nde, ndi ayunyusha wuhu anyu wa mune, ayuwufudia, ayuhamia elua w'akambu anyu w'ololo. 11 Nyu nyambongonyaya lu akambu tshe, ne dia lukahu lone la mamba!

Lukahu lako layukundjiya Unyashungu lusaka uma le su. 12 Ne dia ekambelu k'ulimu one aha paka dia nkutsha yediko y'ehumba w'ekilami tshu, keli ambufudia ndu lusaka efula le Unyashungu. 13 Lu chimbelu k'ulimu one, vo wayutumbula Unyashungu, ne dia ukitanyia anyu wa mbetawo ka lu lukumu l'ololo la Kristu, la dia lukahu lanyu le wo ndu le antu tshe. 14 Ndu vame watunyolombelaka Unyashungu, wambunyukumbula wulu, ne dia ngandji ka mamba k'utamanya ka Unyashungu keli l'etema anyu. 15 Lusaka le Unyashungu, ne dia ushasha andi waheyana mvuta.

Dihumo Diasus Dia Ta

10 Dimi Paulu lambunyosengasenga dia memakana la kenemo ka Kristu — dim'ako lukitshikitshi la ntundu kanyu lam'emi la nyu, keli amakina dimi ndjalaka la dihunga lu dikambu dianyu! — 2 Ee, lambunyosengasenga nti: Dimi hanyena dihunga lu elungamelu keli la mi le akina, watutalaka uku antu watokendakenda lu akambu wa dimba. 3 Kuyanga shu tatokendakenda lu akambu wa dimba, shu hatolo ta uku dia dimba, 4 ne dia dihumo diasus dia ta diaha dia dimba, keli dio dieko la wulu wa Unyashungu wa mpandjula wembe wa ta. 5 Shu tatuhandjulaka tukanyi, ndu engo ka ladikin tshe katosemanelaka la ewu ka Unyashungu, tatolembiaka tukanyi tshe, dia to ndjala la ukitanyia le Kristu. 6 Shu tayuyalongosola dia nsomboya uhedia tshe lam'ayukuka ukitanyia anyu.

Paulu Ambuyateketela Dia Ulimu Andi

7 Nyu nyatendaka akambu wenanyu. Naka untu ambuyaekama ati: Usika Kristu kemi, ndi amuyaenda uku endi usika Kristu, ndu shu pupu. 8 Kuyanga dimi lambuyatumbula kambi ne dia wulu asu, wakatusha Khumadiiondo ne dia nyudia, aha dia nyuhandjula, dimi halutshama sonyi. 9 Dimi ntenamaki uku untu layanga nyutsha woma lu mikanda ami. 10 Ne dia vo mvutaka vati: Mikanda andi weko wutshu la wulu, keli eyeli kandi l'utundu, eko wodu; la diui diandi dieko anyanya. 11 Untu uku eyi dikambu ne ati: Uku wesu lu aui wa mikanda lam'ahasu laawo, osoku mbayutuyala ndu lu etsha asu lam'esu laawo, 12 ne dia shu kema la dihunga dia ndjadikana ndjaedimia la antu akina watuyandulaka. Keli vame watuyaedikelaka, watuyaedimiaka, vo kema

la yimba.

13 Keli shu hatulangi ndjatumbula uleki yediko, tayuyatumbula uku yediko y'ulelu yakatusha Unyashungu uku yediko yasu, yambukuma le nyu. 14 Shu hatutambi ulelu, kuyanga mbakisu kunkuma le nyu, ne dia shu takakumi le nyu, ntundu la lukumu l'ololo la Kristu. 15 Shu hatulekana ulelu asu, dia ndjatumbula l'ulimu w'antu akina. Keli tambulungamela shati: Lam'ayula mabetawo kanyu, shu tayutumbwama l'atei anyu l'ulelu asu, dia shu ntsha ulimu wuleki wuki, 16 ne dia nsambisha wa lu beke dikina dieli la wedi anyu lukumu l'ololo, hatuyatumbula lu leke l'untu ukina lu akambu wakandatshi. 17 Keli one latuyatumbulaka, ayatumbuli le Khumadiondjo. 18 Ne dia aha untu latuyandulaka, kambetawoma, paka one landula Khumadiondjo.

*Ambuka Woma Ati:
Kana Vo Hawokolamela*

11 Dimi lutulanga nyu ndjala la mi lu yema ya nginyanginya! Keli nyu nyambuyala la mi wuhu ako! 2 Ne dia dimi lambunyuka kandjema, kandjema ka Unyashungu. Ne dia dimi lakanyutshukamia le umi otoi, dia nyukimo uku usekaseka w'emuma le Kristu. 3 Keli dimi lambuka woma nti: Uku akadimbiya ului Eva la lukesu landi, tukanyi tanyu tatukulana uma l'uluwanyi a mete la pudipudi utsha le Kristu. 4 Lam'ayuya untu la ndjunyusambisha dia Jesu kina, yakisu kunyusambisha, kana naka nyambulungula nyuma kekina, kakinyu kunungula ntundu, kana lukumu l'ololo lakinyu kumbetawo, nyu nyambuwetawo ololo. 5 Ne dia dimi nkanaka nti: Dimi kema l'okongo w'atumami wuleki waki nduku yema. 6 Kuyanga dimi haleyi nteketa, keli laha osoku lu ewu. Shu takanyenya dikambu so lu akambu tshe.

7 Undi, dimi lakatshi kolo lam'akamayakitshakitsa dia nyu mbediama, ne dia lakanyusambisha lukumu l'ololo la Unyashungu usambishasambisha? 8 Dimi lakavi diango di'Ekelezia ekina, lakalungula afutu uma le wo dia nyukambela ulimu. 9 Lam'akimi la nyu, lam'akamahumbi, dimi taki la wutshu le untu. Ne dia lam'akayi anyasu uma la Makedoniya, vo wakakutsha yediko y'uhumba ami. Dimi lakayashikike nti: Dimi latukuyala wutshu le nyu lu akambu tshe, ku dimi layuyashikike wuhu ako ntu. 10 Uku mete ka Kristu keli le mi, nduku untu ayonembohaya uma lu ndjatumbula kene lu

beke di'Akaya. 11 Dikambu diakona? Ne dia hanyulangi? Unyashungu mbeyaka!

Atumami wa Kashi

12 Keli akambu watumutshaka, layuwatshaka, ne dia minya dikambu dia ndjatumbula uma le wane walanga dikambu dia ndjatumbula. Ne dia lu akambu wa ndjatumbula, vo wayali uku shu. 13 Ne dia antu aksi welu atumami wa kashi, ekambi wa lukesu, wambuyakadimula uku atumami wa Kristu. 14 Oso kema dikambu dia mamba, ne ndu Satana katukadimoka uku ondjelo a yanyi. 15 Okone kema dikambu dia wuki dia ndu ekambi andi nkadimo uku ekambi w'akambu w'ololo. Ekumelu kawo kayuyala uku etsha awo.

Asui wa Paulu Uku Utumami

16 Dimi lambuta ntu nti: Untu tamenaki, dimi Paulu, enginya. Keli naka nyu nyambutsha, nyambunungula uku enginya, dieli la mi dia ndjatumbula yema. 17 Akambu watumutaka, halawati uku aui wa Khumadiondjo, keli uku la nginyanginya, lu dikambu ne dia ndjatumbula. 18 Ne dia antu efula watuyatumbulaka lu akambu wa dimba, ndu dimi layuyatumbula. 19 Ne dia nyu, akanga a yimba, nyatukikelaka dinginya l'ongenongeno. 20 Nyu nyatukikelaka untu lam'anyudjandi lu fumbi, lam'alendi diango dianyu, lam'anyudjandi, lam'ayambiyandi, lam'anyokomolandi lu dundji. 21 Dimi lambuta la sonyi, dia mvuta nti: Shu taki weodu.

Keli naka untu la dihunga lu dikambu dimotshi — lambuta la nginyanginya — keti ndu dimi keli la dihunga. 22 Asi Heberu mbewo? Ndu dimi pupu. Asi Isariyele mbewo? ndu dimi pupu. Tukanula t'Abarahama mbewo? Ndu dimi pupu. 23 Ekambi wa Kristu mbewo? — lambuta uku kanga tshupi — dimi lambâleka lu elimu wuleki efula, lu mvudu ya kanu yuleki efula, lu dikomoki diaheyama mbala, lasuki la nyoi tena efula. 24 Asi Juda wakankomola tena tanu, dia eshingo akumi anei akumi anei; tshikima etena otoi, kaki kundjala akumi anei. 25 Dimi lakakomwama chamba tena satu; wakambuki ave etena otoi; lakasawi tena satu lam'akaditi watu; laki l'ungunda w'ashi utshu otoi la yanyi otoi. 26 Lu kendo tena efula, lu akambu wa wulu lu ekedi, lu akambu wa wulu le apotodi, lu akambu wa wulu le anyami, lu akambu wa wulu le asi wedja, lu akambu wa wulu lu esumba, lu

2 KORETO

akambu wa wulu lu esui, lu akambu wa wulu lu ashi a waki, lu akambu wa wulu l'atei anyasu akanga a kashi. 27 Lu, asui la akambu wa pa, lu esenaki tena efula, la ndjala la pusa, lu dikilelu dia mbu ya nde tena efula, lu tshitshi la utakatakata. 28 Ladiku dia akambu aso wa dimba, dimi la dikambu dieli wutshu le mi la lushi la lushi, ne dia nkanelia Ekelezia tshe. 29 Akona eli wodu, ku dimi hayala la ndi wodu? Akona ambutakanyema, ku dimi halutshama sonyi?

30 Naka dieli la mi dia ndjatumbula, layuyatumbula lu dikambu dia wodu ami. 31 Unyashungu, Shi Khumadiiondo Jesu, one latutumbwamaka, mbeyaka ati: Dimi halati kashi. 32 La Damaseke, umbuledi wa la tshina dia khum'ekanga Areta akalamaka usumba wa Damaseke ne dia mundami. . Keli wakampuluya uma lu didishi lu saka, lu eheli ka lukumbu; lakahandi uma l'anya andi.

Waenelo la Waenyelo wa Paulu

12 Hasungana dia dimi ndjatumbula, keli dieli la mi dia ndjatumbula dia waenelo la waenyelo uma le Khumadiiondo. 2 Dimi mbeyaka untu omotshi le Kristu lakosama edja ndu l'ulungu a satu, aya uku deku dikumi la nei — kana ndi aki la dimba, haleyi; kana taki la dimba, haleyi; Unyashungu keya. 3 Dimi mbeyaka untu ako lakosama utsha lu Paradisu — kana la dimba, kana aha la dimba, haleyi; Unyashungu keya — 4 ku lakuki akambu wahameyi mvuta, wahakuki untu mvuta. 5 Dimi layuyatumbula lu dikambu dia untu oso. Keli dimi hayatumbula dikambu diami, tshikima dia weodu ami. 6 Utumulanga ndjatumbula, tshiki dimi hayala kanga enginya, ne dia layuta akambu wa mete. Keli halatshi osoku, untu talekaki ntumbulami ladiku dia akambu wenandi, kana wukandi, le mi. 7 Ne dia waenyelo a waki utamanya le mi, la dia dimi ntukuleka ndjatumbula, ku wakambisha engo uku tende lu dimba diami, dikendji dia Satana, ne dia mpenyahenyami, dia dimi ntukuleka ndjambiya. 8 Dimi lakalombe Khumadiiondo tena satu dia minyiami engo kene. 9 Ndi akamvutela ati: Ngandji kami ka mamba nkukaka le ye: ne dia wulu ami atukukiamaka lu wodu. Okone dimi layuyatumbula lu wodu ami la ongenengeno efula, ne dia wulu a Kristu ankhukhume. 10 Okone dimi latongenangenaka lu wodu, lu tengo, lu ehumba, lu asui, lu lokonyo, dia dikambu dia Kristu; ne dia lam'emi wodu kemi la wulu.

Tulimbitelu to Utumami

11 Dimi lambuyala enginya! Nyu nyakambete osoku, ne dia diaki la nyu dia mbeyanyami. Dimi taki l'okongo w'atumami wuleki waki, kuyanga mbemi anyanya. 12 Mete, tulimbitelu t'utumami takatshama l'atei anyu l'eteti, ndu tulimbitelu ndu akambu wa mamba, ndu akambu wa wulu. 13 Lu akambu akona wakanyaleki Ekelezia ekina tshitshe, tshikima lu dikambu ne, dia dimi kundjala wutshu le nyu? Nyunyimanyia munga keso.

14 Nyulungi, one eli etena kamumuyalongosola, kayangami ndja le nyu. Dimi hayala wutshu le nyu, ne dia dimi hayangi diango dianyu, lambunuyanga nyame. Ne dia ana hawutumbelaka ambutshi diango, keli ambutshi mbatumbelaka ana diango. 15 Dimi layuyala the ongenengeno otekoya dia nkimo diango, ndu ndjakimo, ne dia nyumu yanyu. Naka dimi lambuleka nyulanga, ku nyu hanyunangi yema? 16 Dikambu so diayali osoku, dimi kundjala wutshu le nyu; ne dia lakewo, lakanyose la yewu. 17 Dimi lakanyukesi uma le untu lakamanyutumela uka? 18 Dimi lakakokomiya Tito, lakatumu unyasu la ndi. Tito akanyukesi uka? Shu konkendakenda la Nyuma pupu? Shu konkendakenda lu wanya ako?

Paulu Ambuyanga Mbaudia

19 Nyu nyambukana tena tshe nyati: Shu tambuyanga ndjayindja lu ashu anyu? La ntundu ka Unyashungu kateketasu le Kristu. Elangimi ami, akambu ane tshe weko dikambu dia nyudia. 20 Ne dia dimi lambuka woma nti: Lam'ayumukuma le nyu, dimi halunyutana wuhu wayumulanga undu, la nyu hanyuntana wuhu wayunyulanga. Dimi lambuka woma nti: Layutana tamu, kandjema, kele, mbatana, nsudukana, ntendana, enginu, la mindju. 21 Ntu, lambuka woma nti: Lam'ayumukuma le nyu, Unyashungu ami ayunkitshakitsa la ntundu kanyu. Ku dimi layulela ne dia antu efula wakatschi kolo ntundu, watakadimula etema uma lu akambu wa mindu la munanyi, la saki y'akambu wa kolo wakawatshaka.

Wasuya Atshi wa Kolo Wulu

13 Etena ka satu kene kayamai uya le nyu. Diui tshe diayushikikala l'enyo w'emenyi ehendi kana esatu. 2 Dimi lakanyutela ntundu, ndu lambunyutela kakiante, uku lam'akimi laawo l'etena ka

hendi, kakiane lam'ahami laawo, lambutela wane wakatshi kolo la ntundu, ndu akina tshe, nti: Naka dimi layuya ntu, haluwauka ketshi. 3 Ne dia nyu nyambuyanga djimbitelu ya dikambu dia Kristu, one lateketa l'utema ami; one laha wodu le nyu, keli ndi eko la wulu l'etema anyu. 4 Ne dia ndi akadiakema lu utamba a mpeketanya lu wodu, keli ndi eko la lumu uma lu wulu a Unyashungu. Shu teko la ndi weodu, keli shu tayuyala la lumu kame la ndi uma lu wulu a Unyashungu le nyu.

5 Nyuyaunganeli nyame, kana nyu la mbetawo; nyuyaediki nyame. Nyame hanyeyi nyati: Jesu Kristu eko l'etema anyu? Naka kema, keti anyanya mbenyu. 6 Keli dimi lambulungamela nti: Nyu nyayeya nyati: Shu kema anyanya. 7 Shu tambolomba Unyashungu shati: Nyu tanyutshaki dikambu dia kolo. Aha ne dia shu ndjala uku wane wetawonyu, keli dia nyu ntsha akambu w'amena, kuyanga shu tayuyala uku antu wi'anyanya. 8 Ne dia shu kema la wulu a ntsha dikambu diutshikitanyi la akambu wa

mete, paka dia mbudia akambu wa mete. 9 Shu tambongenangena lam'esu la wodu, la lam'enyu la wulu. Shu tambunyolombela ndu dikambu so, dia nyu ndjala ololo tshe. 10 Dia dikambu so mbafundami akambu ane lam'ahami laawo, ne dia dimi ntukuyala la dikambu dia nyutshela la ngala lam'ayumuyala la nyu, uku wulu wakambisha Khumadiondjo dia nyudia, aha dia nyuhandjula.

Alaku Amotshi; Ambâtumela Moyo

11 Lu ndjihelu, anyasu, moyo. Nyuyali ololo tshe; nyukikitshami; nyuyali la kanyi otoi; nyujase ki. Ku Unyashungu a ngandji la ki ayuyala la nyu. 12 Nyushani moyo la ononanelu w'ekila. 13 Ekilami tshe wambunyutumela moyo.

Diui di'Etshokwelo

14 Ngandji ka mamba ka Khumadiondjo Jesu Kristu, la ngandji ka Unyashungu, la ekesanelu ka Nyuma k'Ekila, wayali la nyu tshe!